



JABATAN PERKHIDMATAN VETERINAR

Department Of Veterinary Services

Kementerian Pertanian dan Keterjaminan Makanan

Wisma Tani, Blok Podium Lot 4G1 & 4G2

No. 28 Persiaran Perdana, Presint 4

62630 PUTRAJAYA

MALAYSIA

Tel : 603-8870 2000

Faks : 603-8888 6021

E-mel : pro@dvs.gov.my

Laman Web : www.dvs.gov.my

KENYATAAN MEDIA

SITUASI SEMASA VIRUS NIPAH: MALAYSIA KEKAL BEBAS DAN BERWASPADA

PUTRAJAYA: Jabatan Perkhidmatan Veterinar (DVS) ingin memaklumkan bahawa Malaysia pada masa ini adalah BEBAS daripada penyakit Nipah. Walau bagaimanapun, DVS mengambil maklum mengenai kejadian wabak penyakit Nipah yang dilaporkan berlaku melibatkan manusia di West Bengal, India baru-baru ini, dan sentiasa berada dalam keadaan berjaga-jaga serta berwaspada bagi mencegah sebarang risiko kemasukan dan penularan penyakit tersebut ke dalam negara.

Sebagai agensi yang bertanggungjawab terhadap kesihatan haiwan dan pencegahan penyakit zoonotik, DVS sentiasa menjalankan pemantauan berterusan dan bekerjasama rapat dengan agensi berkaitan bagi memastikan status bebas Nipah negara ini terus terpelihara. DVS menjalankan tindakan pemantauan secara berterusan melalui aktiviti surveilans tahunan yang dijalankan dalam babi domestik dan babi hutan untuk pengesanan awal kewujudan penyakit. Pada tahun 2025, lebih daripada 2000 sampel babi domestik dan 48 sampel babi hutan telah diuji dan semuanya menunjukkan keputusan negatif virus Nipah. DVS juga mengawal import daging babi dari luar negara, yang mana hanya negara yang bebas Nipah sahaja yang dibenarkan eksport ke Malaysia.

DVS ingin memaklumkan bahawa kelawar buah (*flying fox*) dikenalpasti sebagai perumah semula jadi virus Nipah, manakala ternakan babi berperanan sebagai perumah pengganda (*amplifying host*), di mana jangkitan dalam populasi babi boleh meningkatkan risiko penularan virus kepada manusia dan haiwan lain sekiranya langkah biosekuriti tidak dilaksanakan dengan berkesan.

DVS juga ingin menegaskan bahawa langkah-langkah kesiapsiagaan dan pemantauan akan terus diperkukuhkan khususnya melalui pemantauan (survelan) terhadap populasi kelawar buah, yang dikenalpasti sebagai vektor semula jadi virus Nipah.

Tanda-tanda klinikal penyakit Nipah pada babi yang dijangkiti boleh merangkumi:

- i. Gejala pernafasan seperti batuk, sesak nafas dan lelehan hidung.
- ii. Demam, kelesuan dan kurang selera makan.
- iii. Tanda-tanda saraf seperti pergerakan tidak terkoordinasi, tremor dan sawan.
- iv. Kadar jangkitan yang tinggi dalam ladang walaupun kadar kematian mungkin rendah hingga sederhana.

Sehubungan itu, DVS ingin menyeru para penternak babi supaya sentiasa berwaspada, terutamanya ladang yang berhampiran dengan dusun buah-buahan atau mempunyai pokok buah-buahan di dalam atau sekitar kawasan ladang, yang boleh menarik kehadiran kelawar untuk mendapatkan makanan dan seterusnya meningkatkan risiko jangkitan virus Nipah.

Penternak dinasihatkan untuk:

- i. Memantau kehadiran kelawar di kawasan ladang.
- ii. Mengurangkan atau menghapuskan faktor tarikan kepada kelawar, termasuk pokok buah-buahan.
- iii. Memastikan amalan biosekuriti ladang berada pada tahap yang tinggi.
- iv. Melaporkan segera kepada pihak DVS sekiranya terdapat sebarang tanda penyakit yang mencurigakan pada ternakan.

Penyakit Nipah merupakan penyakit wajib lapor di Malaysia. Oleh itu, semua penternak dan orang awam hendaklah segera melaporkan kepada Jabatan Perkhidmatan Veterinar (DVS) sekiranya disyaki berlaku jangkitan penyakit tersebut dalam kalangan ternakan.

DVS ingin memberi jaminan kepada orang ramai bahawa status Malaysia sebagai negara bebas Nipah sentiasa dipantau dan dipelihara melalui langkah-langkah pencegahan dan kesiapsiagaan yang berterusan. Orang awam dinasihatkan untuk tidak panik, mendapatkan maklumat daripada sumber rasmi, serta tidak menyebarkan maklumat yang tidak sahih.

DVS akan terus komited dalam memastikan keselamatan kesihatan haiwan, kelestarian industri ternakan dan kesihatan awam sentiasa terpelihara.

DVS turut menyeru semua pihak, khususnya para penternak, agar sentiasa peka terhadap perkembangan semasa penyakit haiwan dan melaporkan segera sebarang tanda klinikal kepada Pejabat Perkhidmatan Veterinar berhampiran atau melalui talian *hotline* 03-8870 2041.

**JABATAN PERKHIDMATAN VETERINAR
KEMENTERIAN PERTANIAN DAN KETERJAMINAN MAKANAN
23 FEBRUARI 2026**